

Perangi ekstremis perlu pendekatan baharu, kata Dr Mahathir
Free Malaysia Today
Sept 15, 2016

Tanpa ilmu pengetahuan, umat Islam tidak akan dapat bersaing dengan negara besar dunia.

KUALA LUMPUR: Umat Islam perlu mengkaji semula pendekatan mereka mengenai Islam terutamanya dari segi kesederhanaan bagi memerangi ekstremis agama, kata Tun Dr Mahathir Mohamad.

Beliau berkata mesej Islam sebenar harus diperjelaskan bagi menangani fahaman dan ideologi ekstremisme.

Selain itu, umat Islam perlu menitikberatkan ilmu pengetahuan dan bukannya menekankan kepada aspek keagamaan semata-mata kerana Islam tidak terhad kepada solat sahaja, kata Yang Dipertua Pertubuhan Kebajikan Islam Malaysia (Perkim) itu merasmikan mesyuarat agung tahunan yang ke-55 badan itu, malam semalam.

“Kita (umat Islam) tidak boleh melupakan aspek pendidikan, tanpa ilmu pengetahuan ummah tidak akan dapat bersaing dengan negara-negara besar dunia.

“Tetapi malangnya pada hari ini orang Islam lebih gemar berperang sesama sendiri dan menggunakan kegasan. Ini bukan Islam sebenar,” katanya.

Mesyuarat 2 hari bermula hari ini dihadiri lebih 200 perwakilan Perkim di seluruh negara, dan pada majlis itu Mufti Perak Tan Sri Dr Harussani Zakaria dianugerahi Tokoh Pendakwah Unggul Perkim 2016 di atas usahanya mengembangkan ajaran Islam.

Turut hadir Setiausaha Agung Kehormat Perkim Tan Sri Dr Mohd Yusof Noor dan Menteri di Jabatan Perdana Menteri Datuk Seri Dr Shahidan Kassim.

Copyright (C) 2009-2016 MToday News Sdn. Bhd. All Rights Reserved.

Source: <http://www.freemalaysiatoday.com/category/bahasa/2016/09/15/perangi-ekstremis-perlu-pendekatan-baharu-kata-dr-mahathir/>